



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Conciliorvm Omnivm Generalivm Et Provincialivm Collectio Regia**

Ab anno DCCCLXXII. ad annum DCCCCIX.

**Parisiis, 1644**

Epistola XXXV. Ioannis Papae VIII. Ad Episcopos In Regno Caroli Imperatoris Constitvtos. Monet vt imperatorem hortentur ad opem ecclesiae Romanae celeriter ferendam.

**urn:nbn:de:hbz:466:1-15967**

EPISTOLA XXXV.  
IOANNIS PAPÆ VIII.

AD EPISCOPOS IN REGNO CAROLI  
IMPERATORIS CONSTITUTOS.

Monet ut imperatorem hortentur ad opem ecclesiae  
Romanæ celeriter ferendam.

*Ioannes episcopus omnibus archiepiscopis & episcopis in regno  
imperatoris Caroli constitutis.*

**P**RISTINIS attriti miseriis, & oppressi calamitatibus, dilectissimi filii nostri magni imperatoris Caroli, quasi de profundis ad Deum clamantes, tamquam ipsius Domini & Saluatoris nostri anxii expectabamus aduentum, & ut ita dixerim, eius iteratum pro salute nostra credebamus imminere descensum. Sed, proh dolor! tot tantis circumdamur hinc inde periculis, ut tædeat nos etiam viuere. Ecce enim dominicarum ouium ab Agarenis, qui sunt filii fornicationis, nec non & ab his qui solo sunt nomine Christiani, aliae gladio trucidantur, aliae fame pereunt, aliae vero in prædam & captiuitatem ducuntur. Sed & pastores earum, reuerendi episcopi, profugiunt, & vagi huc illucque palantes omni penitus egestate tabescunt. Redacta est terra in solitudinem, & ablatis ab illa hominibus, ferarum saltus effeta est: ciuitates, castra, & villæ subuersæ, nec ubi earum fuerint ædificia, innuant. Sed & venerabilia loca destruentes, altaria Domini suffoderunt, ministros & seruos eius occiderunt. Facti sumus, secundum Psalmistam, *Psalm. 43.* in derisum & contemptum his qui in circuitu nostro sunt: dum illi aut vicinorum auxilio potiuntur, aut saltem paeto, secundum Apostolum, tempus redimunt, quo- *Ephes. 5.* niam dies mali sunt. Seminamus pedentim, quamuis in lacrymis, nec recollimus; imo iam nec seminandi facultas suppeditat. Sedet in tristitia domina orbis, mater ecclesiarum, magistra gentium, consolatio tristium, & non est qui adiuuet, non est qui consoletur eam, nisi tu solus, o bone Deus, & si non propter iniquitates nostras, sed spe, quæ secundum Apostolum non confundit. Quæ, fra- *Rom. 5.* tres carissimi, partim vobis significamus, (nam si per fin-  
*Concil. Tom. 24.* G

## 50 IOANNIS PAPÆ VIII.

gula scribere tentassimus, facilius nobis charta quam sermo deficeret ) vt sicut vnum corpus sumus in capite Christo, & alter alterius membra, ita nobiscum pariter condoleatis & compatiamini: quia *si quid vnum patitur membrum*, vt Doctor gentium ait, *compatiuntur omnia membra*: *& si compatimur, & conregnabimus*. Condolentes autem nobis, & compatientes, accedatis ad Christianissimum filium nostrum, & consilium Domini ab eo non abscondatis: suggestentes, & exhortantes, vt perpendat quis & quam terribilis sit ille, qui hunc ante saecula huic præfuturum regioni prædestinauerit, & quam districte ab eo exacturus sit quod commisit: qui scilicet tam preciosi sanguinis fusione quod credidit emit. Meminerit etiam, quia & nos illum præ ceteris propinquis & æmulis eius amauimus, elegimus, & prætulimus. Vnde & eum aduersus omnes hostes ecclesiæ non solum defensorrem, sed & patronum & aduocatum nostrum existere proposuimus: vt quod ei nos apud Deum esse fatagimus, ipse inter homines pro nobis fieri non detrectet: præcipue vt accelerans nobis subueniat, & sine mora contra perfidos Christianos & infideles succurrat. In quo sanctæ fraternitati vestræ præ omnibus laborandum est: pro commisso scilicet sibi sacerdotali officio, & quia, vt cum propheta veridico fateamur, si haec humiliatur, ad cuius confugietis auxilium, vel vbi relinquetis gloriam vestram?

Data III. Kalendas Martii, indictione decima.

## EPISTOLA XXXVI.

## IOANNIS PAPÆ VIII.

AD LANDVLPHVM EPISCOPVM CAPVANVM.

Mittit legatos, vt Docibilis Hypatus petierat: hortatur vt det operam vna cum legatis, vt pactum cum Saracenis initum dissoluatur; se quidquid ab eo constitutum fuerit, approbaturum.

*Landulpho episcopo Capuano.*

**N**OVERIT industria tua, nos tam Sergii magistri militum, quam Docibilis Hypati epistolas suscepisse: quibus cognouimus eos excusabiles se velle coram nobis reddere tentauisse super contracto infando fœdere, quod